



STINAPA TA INFORMA

WAK BO PIANAN BOU DI AWA

Hopi di nos ta lubidá ku nos tin mas hóben èks-kampion di windsurf na Boneiru. Un di e talentonan aki ta Ronald Mayer di Playa Pabou. For di su 9 aña el a kuminsá windsurf danki na su ruman hòmber ku a dun'é lès komo un regalu di kumpleaño. Ronald a sa di saka kara di Boneiru na diferente okashon na Merka. Su pashon a bira su profeshon: instruktor di windsurf na The Place. Tambe e ta hopi orguyoso di su promé yu. Ronald ta sinti'é orguyoso di por biba na Boneiru: lanta tur mainta, skucha e kanto di paranan, respirá e airu fresku. I admirá kon nos animalnan por kana liber sin ningun peliger manera na otro pais. E ta gosa ku na Boneiru nos laman ta asina limpi i ku nos piskánan ta saludabel i asina bunita. E tin un sentimentu di libertat total ora e ta den naturalesa boneriano. Pa Ronald ta mas ku lógiko ku naturalesa ta di sumo importansha pa turismo i pues pa nos ekonomia. E ta sigui splika ku ta turismo tin Boneiru progresando. E mes ta biba di turismo ya ku mayoria di e klientenan ta turista. Mayoria di nan ta bini tambe pa tour rònt di nos isla i admirá nos paranan i matanan. Ronald ta konta kon e turistanan ta ekspresá e limpiesa i puresa di nos laman. "Nan ta bisa ku porfin nan por wak nan pia bou di awa", e ta konta bou di harimentu. No ta difísil indiká su lugá faborito den naturalesa: su lugá di su trabou ku ta Sorobon. Ronald ta konta ku entusiasmo kon speshal e ambiente ta na Sorobon. Ademas di por disfrutá di e deportenan akuátiko, bo por sigur gosa di e bunitesa di e matanan, laman i shelu kla. Tur esaki ta duna un dimenshon èkstra ora bo ta sinta kombersá i relahá ku bo amigunan. E ta aksentuá ku nos mester sigui hasi esfuerso pa mantené Boneiru limpi. "Esei ta tene nos tur na bida" e ta splika. *Skirbí pa Natalie Wanga.*

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESA



Traha huntu na un desaroyo duradero pa Boneiru